



BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
GRAD SARAJEVO
OPĆINA CENTAR SARAJEVO
OPĆINSKI NAČELNIK

P R A V I L N I K

**O RASPODJELI NOVČANIH SREDSTAVA ZA DODJELU STALNE NOVČANE
POMOĆI PENZIONERIMA U STANJU SOCIJALNE POTREBE I LICIMA PREKO
60. GODINA STAROSTI BEZ PRIMANJA**

Maj, 2017. godine

Na osnovu člana 15. stav 1. tačka 2. Zakona o principima lokalne samouprave u Federaciji Bosne i Hercegovine ("Službene novine Federacije BiH " broj 49/06 i 51/09), člana 25. Statuta Općine Centar Sarajevo i Odluke o izvršavanju Budžeta Općine Centar Sarajevo za tekuću godinu, Općinski načelnik donosi

P R A V I L N I K

O RASPODJELI NOVČANIH SREDSTAVA ZA DODJELU STALNE NOVČANE POMOĆI PENZIONERIMA U STANJU SOCIJALNE POTREBE I LICIMA PREKO 60. GODINA STAROSTI BEZ PRIMANJA

Član 1.

Ovim Pravilnikom uređuju se kriteriji i način dodjele stalne novčane pomoći (u daljem tekstu: stalna pomoć) licima u stanju socijalne potrebe, čije je prebivalište na području Općine Centar Sarajevo najmanje dvije godine do dana podnošenja zahtjeva ili imaju boravište po osnovu statusa raseljenih lica i izbjeglica u Općini Centar Sarajevo.

Član 2.

Cilj dodjele stalne novčane pomoći u smislu ovog pravilnika predstavlja kontinuiranu brigu o licima treće životne dobi, a koja se nalaze u stanju socijalne potrebe, kako bi zadovoljili minimum egzistencije, te otklonili posljedice socijalne isključenosti.

Član 3.

Sredstva utvrđena na ekonomskom kodu 614200 – grant pojedincima za pomoć socijalno ugroženim osobama na ime participacije za nabavku hljeba i mlijeka, raspoređuje Općinski načelnik zaključkom na prijedlog Službe za rad, socijalna pitanja, zdravstvo, izbjegla i raseljena lica (u daljem tekstu Služba) u skladu sa utvrđenim kriterijima, a na osnovu podnesenih zahtjeva putem protokola Općine Centar Sarajevo.

Član 4.

Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugih lica.

Član 5.

Licima u stanju socijalne potrebe iz prethodnog člana smatraju se:

- a) Penzioneri čija ukupna primanja porodičnog domaćinstva ne prelaze iznos od 400,00 KM;
- b) Penzioneri čija ukupna primanja porodičnog domaćinstva ne prelaze iznos od 400,00 KM a koji ostvaruju prava iz nadležnosti Službe socijalne zaštite JU Kantonalnog centra za socijalni rad Sarajevo;
- c) Penzioneri koji su putem Službe za rad, socijalna pitanja, zdravstvo, izbjegla i raseljena lica Općine Centar evidentirani kao lica u stanju socijalne potrebe ili je Služba na osnovu podnesenog zahtjeva utvrdila da ispunjavaju uvjete ovog Pravilnika;
- d) Lica starosti preko 60. godina bez primanja;
- e) Lica starosti preko 60. godina koja nisu ostvarila pravo na penziju, a koja ostvaruju prava iz nadležnosti Službe socijalne zaštite JU Kantonalnog centra za socijalni rad Sarajevo;

Član 6.

Penzioneri i lica preko 60. godina starosti koja se nalaze u stanju socijalne potrebe mogu ostvariti stalnu pomoć pod sljedećim dodatnim uslovima:

- a) da niko od članova zajedničkog domaćinstva nije vlasnik ili posjednik motornog vozila;
- b) da niko od članova zajedničkog domaćinstva nije vlasnik preduzeća ili samostalne radnje i da nema registrovanu dopunsku djelatnost;
- c) da nisu vlasnici stana u zgradi kolektivnog stanovanja većeg od 50m² za jednočlano domaćinstvo a za višečlana domaćinstva se za svakog narednog člana dodaje još 10m²;
- d) da nisu vlasnici stana u individualnom stambenom objektu većeg od 60 m² za jednočlano domaćinstvo a za višečlana domaćinstva se za svakog narednog člana dodaje još 15m²;
- e) da nemaju riješeno stambeno pitanje.

Član 7.

(1)Prioritet prilikom ostvarivanja prava iz ovog Pravilnika imaju lica:

- a) koja nemaju riješeno stambeno pitanje, odnosno podstanari su ili žive kod rodbine;
- b) koja ostvaruju minimalnu penziju kao jedino primanje domaćinstva;
- c) koja ostvaruju minimalnu penziju a korisnici su prava na topli obrok putem Javne kuhinje ili prava na tuđu njegu i pomoć putem kantonalne Službe socijalne zaštite;
- d) koja su starija od 65. godina bez primanja,
- e) koja su starija od 65. godina bez primanja a korisnici su prava na topli obrok putem Javne kuhinje ili prava na tuđu njegu i pomoć putem kantonalne Službe socijalne zaštite.

(2)Služba po podnesenom zahtjevu na osnovu priložene dokumentacije sačinjava socio-anamnestičke podatke te odlučuje koja lica u skladu sa ovim Pravilnikom imaju prioritet prilikom ostvarivanja prava.

(3)Prilikom odlučivanja o licima koja imaju prioritet uzimat će se u obzir i dodatni kriteriji koji ukazuju na veći stepen stanja socijalne potrebe korisnika kao što su: starosna dob, stepen invalidnosti, vrsta oboljenja, uslovi stanovanja, materijalni status, broj članova porodičnog domaćinstva i sl.

(4)Služba zadržava pravo mijenjana postojeće liste korisnika prava iz ovog Pravilnika ukoliko utvrdi da se neko od lica na listi čekanja nalazi u većem stanju socijalne potrebe od već postojećih korisnika.

Član 8.

Stalna novčana pomoć utvrđuje se u mjesečnom iznosu od 50,00 KM u skladu sa Budžetom obezbjeđenim sredstvima za tekuću godinu, a namijenjena je za kupovinu hljeba i mlijeka socijalno ugroženim penzionerima i licima bez primanja preko 60. godina starosti, koji ostvaruju prava po ovom Pravilniku.

Član 9.

Služba će pismenim putem obavijestiti korisnike koji ispunjavaju uvjete za ostvarivanje prava po ovom Pravilniku.

Član 10.

Lica koja ostvare pravo na stalnu pomoć u skladu sa odredbama ovog Pravilnika ne mogu ostvariti pravo na jednokratnu novčanu pomoć utvrđenu Pravilnikom o raspodjeli novčanih sredstava za dodjelu jednokratne novčane pomoći licima u stanju socijalne potrebe.

Član 11.

Služba će po prijedlogu korisnika ili službenoj dužnosti vršiti korekcije na način da će sa spiska korisnika stalne pomoći brisati korisnike koji više ne ispunjavaju uslove predviđene ovim Pravilnikom a uvoditi nove korisnike koji ispunjavaju te uslove.

Član 12.

(1) Stalna pomoć penzionerima i licima preko 60. godina starosti u stanju socijalne potrebe dodjeljivat će se isključivo na osnovu Odluke o izvršavanju Budžeta za tekuću godinu donesene od strane Općinskog vijeća Općine Centar Sarajevo.

(2) Isplata stalne pomoći penzionerima u stanju socijalne potrebe vršit će se putem Službe za finansije uplatom na tekući račun korisnika.

Član 13.

(1) Ovaj Pravilnik stupa na snagu narednog dana od dana objavljivanja na oglasnoj ploči Općine Centar Sarajevo.

(2) Stupanjem na snagu ovog Pravilnika prestaje da važi Pravilnik o raspodjeli novčanih sredstava za dodjelu stalne novčane pomoći penzionerima u stanju socijalne potrebe i licima preko 60 godina starosti bez primanja broj: 10-14-4290/16 od 23.01.2017. godine.

OPĆINSKI NAČELNIK

Broj:
Sarajevo: .2017. godine

Prof.dr. Nedžad Ajnadžić

Napomena:
Pravilnik je objavljen na oglasnoj ploči Općine Centar Sarajevo dana _____ 2017. godine